



مسرحية الأطفال الفكاهية



تأليف / عبدالواحد محمد

الفصل الاول

(المنظر عبارة ساحه فريج اوشارع مقابل منزل ام مجود ويظهر سلوم يلعب بالكره لوحده وسعد جالسا ياكل خبز وجبن وهو شاب متين وكسول ولا يحب الرياضه تدخل فتاه وهي تمثل دور مذيعة وفي يدها ميكروفون ومعها مصور)

المذيعة : نرحب بكم احبائنا الاطفال في حلقة جديده من برنامجكم نجوم الفريج . (موثر تصفيق). ونحن اليوم في فريج الوكره وبالتحديد امام منزل مجود كوره حيث يمارس مجموعه من نجوم الفريج هوايتهم المفضله من خلال لعبة كرة القدم وسوف نحاول ان نلقي الضوء في حلقة برنامجنا اليوم على هؤلاء النجوم –
(المذيعة تطلق صافره وتخرج مع المصور)

سلوم : (يتوقف عن اللعب) اشفيهم الربع تاخروا وايد ؟

سعد : (ياكل بشراهه) .. اشفيك انت كم مره اقولك راحوا البحر يسبحون ...

سلوم : وانت ليش مارحت تسبح معاهم

سعد : تبني امي اتهلوشني

سلوم : انزين روح طق الباب على مجود وحمود خلهم ايون

سعد : وليش ماتروح انت .. شنو اشتغل عندك انا

سلوم : سعود اشتاكل انت ؟

سعد : خبز وجبن .. هاي اكلتي المفضله

سلوم : زين قوم لعب معاي كوره قوم ..

سعد : (ياكل بشرأهه) .. انا ماحب اللعب كوره

سلوم : هاي اللي انت فالج فيه .. البلعه وبس (يدخل مجود
وحمود مسرعين وكل واحد منهم يرتدي فردة حذاء
واحد)

سلوم : مجود .. حمود اشفيكم تاخرتوا هالكثر ؟
(مجود وحمود ينظران لبعض ويتقابلان وجها بوجه
بوسط المسرح)

مجود : (صارخا) حمود التمهه هات الجوتي احسن لك

حمود : (صارخا) مجود كوره اقولك هات الجوتي احسن لك

مجود : روح زين روح انت مب على كيفك اتضيع جوتيك
وتاخذ جوتي ...

حمود : افصخ الجوتي مجود لاينشق ترى باشق حلجك

مجود : شوف ريلك اشطول جنبها ريل بعير ..

حمود : يعني ماتبي تعطيني الجوتي .. براويك الحين
(كل واحد فيهم يحاول خلع الحذاء من رجل الاخر
بالقوه)

سلوم : يالربع الحين مب وقت هواش على جوتي .. احنا اليوم
لازم نتمرن عدل عشان بكره عندنا مباراة الكاس مع فريق
النجوم..هاك حمود خذ جوتي ولاتهاوشون
(سلوم يخلع حذاءه ويعطيه لحمود .. يتوقفان عن
العراك)

مجود : (وهو يرتدي فردة حذاءه) .وين باقي الشباب اشوفهم
تاخروا. ليكون نسوا انه في تمرين اليوم ...

سلوم : سعود ايقول انهم راحوا البحر.. (يلاحظ حمود خائفا)
اشفيك حمود شكلك خايف

حمود : اي والله خايف ياسلوم .. لاني سمعت انه فريق النجوم
مستعدين حق هالمباراة وناوين ايفوزون علينا باي طريقه
وسمعت ان صلوح اللوح بيلعب معاهم بكره ..

مجود : انشالله مارادونا يلعب معاهم احنا مب خايفين منهم

سلوم : اتصدق يامجود انهم من الصبح رايعين يتدربون في ملعب
الفريج ..

مجود : انشالله يتدربون ليل ونهار .. احنا فايزين بكره يعني
فايزين

حمود : فريق النجوم وايد قوي .. ولاتنسوا يالربع انهم اخر مره
فازوا علينا اربعة صفر..

موجود : واحنا انشالله بنردها لهم هالمره وبنفوز عليهم وناخذ
الكاس منهم المهم الحين خلونا انشد حيلنا في التمرين
يلا سلوم روح حط الاقوال بسرعه وخلونا نبدا التمرين
عشان مايضيع علينا الوقت ...

سلوم : اوووووكي .. (يذهب ويسحب قطعتين من الحديد تبدوا
على شكل اهداف مرمى ويضعها في الاماكن المناسبه
بينما تطلق المذيعه الصافره وتدخل على المسرح مع
المصور)

المذيعه : طبعاً حبايبي الاطفال الوقت مهم جداً بالنسبة للرياضي
سواء وقت التمرين.. وقت الطعام والاهم وقت الراحة
والنوم.. على هذا الاساس الوقت في حيات الرياضي
ينطبق عليه المثل اللي ايقول الوقت كالسيف ان لم
تقطعه...

الجميع : قطعك.... (تدخل ام موجود على المسرح فتركل المذيعه
الكره وتصيب ام موجود بالكره وتهرب)

ام موجود : حسبي الله عليكم من عيال بعد رديتو تلعبون كوره
اهني.(تاخذ منهم الكره وهي غاضبه .. بينما يخرج
بومجود من المنزل)

بومجود : انتي اشفيج يامرہ ما عندج الا اتهاوشين العيال

ام موجود : انا كم مره قلت لهم لاتلعبون كوره احذا البيت .. ولا
يسمعون الكلام ...

بومجود : يابنت الحلال خليه يلعبون يمكن يطلع منهم لاعب
جيد ... ايقولون هالايا من الكوره

ام مجود : هذي بدال ماتقولهم يدرسون اتشجعهم على اللعبه

مجود : يمه واللي ايسلمج بتكون هذي اخر مره

ام مجود : لعب كوره عند البيت مافي.. يلا شيلوا شلايكم اشوف
ورحوا العبوا في مكان ثاني

بومجود : يابنت الحلال وين ايروحون .. خليه يلعبون اهني
احسن مايروحون يلعبون في الشوارع وتدعمهم
السيابير

ام مجود : يابومجود الدوله ماقتصرت وسوت لهم ملاعب خاصه
حق لعب الكوره في الفرغان ليش مايروحون يلعبون
هناك ...

مجود : هناك عيال الدقل يلعبون سلوم ايقول انهم من الصبح
حاجزين الملعب ..

ام مجود : يايمه اهني مب مكان لعب كوره وانتوا ماخليتوا
شي ماكسرتوه .. يوم كاسرين الليت .. يوم كاسرين
الزرع .. يوم كاسرين ريل العنز .. (مجود يقتل صوت
العنز فتخاف ام مجود والجميع يضحك) .. وي وي
وي خر عتني حسبي الله عليك من صبي ...

سلوم : الله ايجليج عمتي على شان خاطري خرينا نلعب بكره
عندنا مباراة مهمه على الكاس ..

ام مجود : وانا اشعلي منكم ومن الكاس ... لالا لالا ... مافي لعب
اهني يلا مافي لعب

سلوم : نوجد عمتي مانلعب اهني مره ثانيه

مجود : وانشالله من بكره بنروح نلعب في ملعب الفريج

سلوم : واللي ايسلمك عمي بومجود قولها. (يقبله على راسه)

بو مجود: حبتك العافيه ياولدي ياسلوم . بس عشان خاطري
يا ام مجود خليه يلعبون اليوم. .

ام مجود : يلا عاد العبوا بس اتحملوا اتكسرون شي ترا ياويلكم ..

الجميع : (بفرح) انشالله يمه ...

بومجود : وانت ياسعود ليش ماتلعب معاهم ؟

سعد : عمي انا ماحب اللعب كوره .. ولا احب الرياضه

بو مجود : لكن الرياضه زينه اتنشط جسمك واتقويه واتخليك
رشيق وانيق. (يستعرض عضلاته ويحاول ان يمشي
على المسرح برشاقه). شوفني انا اشلون رشيق وانيق
لاني كل يوم اروح اسوي تمارين سويديه على
الكورنيش. (سعد يحاول تقليد بومجود والجميع
يضحك فتنتبه له ام مجود فتضربه).

ام مجود : وانت يامال الضعفه امك اتقول سعود ليل
ونهار ما عنده الا زط خبز وجبن ورقاد ...

مجود : يمه شوفي وزنه اشلون زايد صاير جنبه فيل صغير..
(الجميع يضحك وسعد يشعر بالخرج)

سعد : (غاضبا) اوووه عاد لاتقعدون كل يوم تتطنزون علي

ام مجود : روح زين .. (تدفعه بعيدا فيقع والجميع يضحك
وتدخل المنزل مع بومجود .. تدخل المذيعه) ..

المذيعه : (للجمهور) احبائي الاطفال الرياضه للجميع ..
لل كبار والصغار. حتى الفتيات والنساء لازم ايمارسون
الرياضه علشان ايحافضون على صحتهم ورشافتهم ..
مثل بومجود شفتو اشلون ماشالله عليه رشيق وانيق
ومثل مايقولون العقل السليم في الجسم السليم (يدخل
الاداري ومعه مدرب اجنبي من الجبهه الاخرى
للمسرح فتهرب المذيعه بينما مجود يقوم ببعض
الحركات الفنيه بالكره)

الاداري : شوف ياكابتن هذي المجموعه اللي قلت لك عنهم
بصراحه لعبيه موهوبين وخصوصا هذا اللي اسمه
مجود بصراحه لعب كوره حياته كلها كوره في كوره ..
حتى ربعه ايسمونه مجود كوره من كثر مايحب
الكوره.. شوف لمساته للكوره اشلون حلوه ..

المدرّب : (ينظر لمجود باعجاب) يس يس .. هذا في المستقبل
راح اكون لاعب ونجم كبير

الاداري : حتى اخوه حمود التمه لآعب موهوب .. ابيك اتشرف
لعبهم واتراقب حركاتهم ولمساتهم الفنية للكور ووالي
يعجبك منهم ناخذة النادي عندنا .. (يدخل ثلاثة شبان
من فريق النجوم على المسرح وهم صلوح اللوح
وشابان .. ويقومون بالسخرية من مجود وزملائه)

**صلوح : مساكين بعض الناس من صجهم يتمرنون عبالهم بيفوزون
في مباراة بكره ياااااو ..(يضحكون)**

شباب ١ : الله يا لاقوال بتدخل على بعض الناس مثل المطر يا ااااااو
(يضحكون)

شباب ٢: الله يابعض الناس اقل شي بكره بينهزمون عشرة صفر
ياااااو .. (يضحكون .. يندفع مجود ليتعارك معهم فيمنعه
حمود وسلوم والشباب يهربون لخارج المسرح)

مجود : ہدونی علیہم اقولکم ہدونی

حمود : مجود خلهم ايولون اشتبي فيهم

مجود : ماتسمعونهم شيقولون بطوا جبدي

سلوم : خلهم ايولون يامجود بكرة بنرد عليهم في الملعب
(فاصل موسيقي + اضلام خفيف حيث يتم تغيير الديكور
على المسرح الى ملعب كرة قدم في الفريج واثاء تغيير
الديكور يدخل المعلق في مقدمة المسرح ويجلس على
ويقوم بالتعليق على المباراة بطريقه كوميديه وبشكل
عشوائي غير منظم)

المذيع : اعزائي المشاهدين نرحب بكم من ملعب فريج الدوحة
الجديده وفي المباراه النهائيه على كاس الفريج والتي
تجمع بين فريق التحدي بقيادة الكابتن مجود كوره
وفريق النجوم بقيادة الكابتن صلوح اللوح (يدخل
الفريقان للملعب مع موثر تصفيق الجمهور) ياسلام
وكما نرى الحين يدخل الفريقان لارض الملعب وطبعاً
مبارة اليوم مباراه مهمه جدا وايد لانه الفريق الفايز
فيها راح ياخذ كاس الفريج. والفريق الخاسر طبعاً
سياخذ المركز الثاني. (الحكم يطلق الصافره لتبدا
المباراه) ياسلام الكوره الحين في نص الملعب
ياسلام .. مجود يستلم الكوره وايعدي من واحد وايعدي
من الثاني .. حلوه يامجود .. حلوه يامجود .. اووووه
ياللروعه ايسدد مجود ولكن الكره ترتطم بالعارضه ..
ياخساره يامجود ياخساره ضاعت منك هذي الكوره
(مجود يبدوا نادما على اضاعه الهدف .. الاداري
والمدرّب يقفان في احدى زوايا المسرح)

الاداري: اشرايك في هذا اللاعب ياكابتن ؟

المدرّب : قووود .. بصراحه فنان .. لاعب موهوب .. اووووي

الاداري : عارف ياكابتن لو اداره فريق الرهيب شافوا هذا
اللاعب على طول بياخذونه عندهم في النادي

المذيع : وهذي هجمه عكسيه لصالح فريق التحدي والكوره مع
حمود يلعبها لسلوم وسلوم ايرجعهما مره ثانيه لحمود
وحمود ايحاور واحد وايحاور الثاني ياسلام عليك
ياحمود وايحاور الثالث .. ولكن الكوره تنقطع من
حمود ..

مجود : (صارخا) حمود يا اناني .. اللعب باس اشفيك ..

المذيع : ياسلام وتعود الكره مره اخرى لفريق النجوم وهذي الكوره خطيره .. خطيره لفريق النجوم .. وصلوح اللوح ينفرد بالمرمى .. اااه وتضيع هذه الكره .. من فريق النجوم .. (الحكم يطلق صافرته) ومع نهاية هذه الهجمه الخطيره لفريق النجوم يطلق اعزائي المشاهدين حكم المباره صافرته معلنا نهاية الشوط الاول والتي انتهت نتيجهها بالتعادل صفر لصفر .. اذا استراحه قصيره ثم نتواصل معكم الشوط الثاني من المباراه ..

سلوم : يالربع اشفيكم وايد ضيعنا اهداف ..

حمود : مجود ركز اشوي .. كم كوره ضاعت منك جدام القول

مجود : انا مركز حمود بس انت خل عنك الانانيه واللعب باس

صلوح : (صارخا على زملاءه) شباب شدوا حيلكم ترى اهمه ضاغطين علينا في الشوط الاول ..

الاداري : ياسلام لعب الفرغان وايد ممتع ياكوتش .. شوف القلق .. شوف التوتر .. شوف الاعصاب .. شوف الروح والاخلاص للفريق .. (يطلق الحكم الصافره ويدخل الفريقان للملعب)

المذيع : وهذي عوده اعزائي المشاهدين للشوط الثاني للمباراه
 النهائيه لكاس الفريج بين فريقي التحدي والنجوم وكما
 شاهدنا الشوط الاول اللذي كان مثيرا وقد انتهى بنتيجه
 التعادل صفر لصفر بين الفريقين .. وقد انطلقت المباراه
 قبل قليل وهذه كره سريعه تمر من امام القائم من تسديده
 قويه من اللاعب صلوح اللوح .. ويبدو ان فريق النجوم
 قد غير من خطته داخل الملعب في هذا الشوط .. ياسلام
 مجود ينطلق بالكره سريعا من الجبهه اليمنى للملعب
 ويرفعها عاليه ولكن الكره في يد حارس مرمى فريق
 النجوم (سعد جالس خلف المرمى وياكل ساندويش
 ويشرب عصير بونص)

مجود : سعود هات الكوره بسرعه

سعد : يااه روووح زين مب متفرغ لك انا...

حمود : سعود اتحمل اتخلص العصير بونص عني

مجود : ياخي مب وقت عصير بونص الحين روح دش داخل ..

المذيع : وتعود الكره مره اخرى للملعب .. وووو .. لالا

حمود: (صارخا) فاول ياحكم .. فاول والله فاول ..
 الكوره المست يده (الحكم يطلق الصافره والمجموعه
 تتحدث مع الحكم)

(فاصل موسيقي ونرى لاعبين فريق النجوم وعلى
 راسهم صلوح اللوح وهم يحملون الكاس ويلفون به
 حول الملف ومجود وزملاءه ينظرون لهم بحزن حتى
 يخرجون الى خارج الملعب اضلام سريع وتعود
 الاضاءه مع فاصل موسيقي حزين على المسرح ونرى
 مجود جالسا وسط المرمى حزينا ومعه كل من حمود
 وسلوم وسعد)

سلوم : خلاص يامجود انسى اللي راح حبيبي

مجود : (بحزن شديد) اشلون انسى يا سلوم .. انا للحين مب
 مصدق خسرنا الكاس

سعد : (جالسا مكانه خلف المرمى ياكل) كله منك يامجود.. انت
 سجلت علينا قول (مجود ينظر لسعد بغضب)

سلوم : سعود خلاص اسكت

حمود : (يحاول مساعدة مجود على القيام) مجود قوم خلنا
 انروح البيت ياخوي قوم (وفي هذه الاثناء يتقدم
 الاداري والمدرّب من المجموعه ويضع المدرّب رجله
 على الكره في منتصف المسرح والجميع ينظر اليه
 باستغراب)...

المدرّب : الرياضه فوز وخساره ياهبوب

الاداري : واليوم انت خسران بكره اكون فايز

مجود : من انتوا ؟

المدرّب : انتا هبوب كوره ؟

الاداري : وانت حمود التّمبه ؟

حمود : انتوا من ؟

الاداري : انا اداري في فريق الزعيم وهذا مدرّب الفريق واحنا صار لنا فتره طويله انراقبكم وانشوف لعبكم .. انتوا بصراحه لعبيه موهوبين

الاداري : وعلى هادا الاساس قررنا ناخذكم معنا النادي

حمود : (بفرح) اشلوووون .. ب ب بتاخذونه النادي ؟

الاداري : طبعاً بناخذكم النادي

مجود : (بفرح) يعني تبونا نلعب معاكم في النادي

حمود : ياسلام .. مجود احنا بنلعب في نادي الزعيم .. الله (يمسك يد حمود ويلف معه في المسرح)

الاداري : هاللا ... اشرايكم ..

الاثنان : احنا موافقين ...

(اضلام + فاصل موسيقي)

(وتفتح الاضاءه مره اخرى على ديكور عباره عن
ملعب كره قدم في نادي الزعيم.. يدخل الفريق
بالملابس الرياضيه ويدخل مجود وحمود مع
الفريق بالملابس الرسميه .. الثوب والقحفه
واقدامهم حافيه .. يدخل المدرب حاملا في يده
مجموعة من الكور)...

المدرّب : يلا شباب .. يلا تمرين يلا (ينتبه لمجود وحمود)
اونووو وات نس هبوب. كام هير همود (يدخل
الاداري والمدرّب يتحدث معه .. ياتي مجود
وحمود)

الاداري : مجود.. حمود .. ليش مالبستوا ملابسكم الرياضيه

حمود : انا ماعرف اللعب بالفانيله والهاف .. ماعرف اللعب الا
بثوب وقحفه ...

الاداري : (باستغراب) لا والله

مجود : (في يده حذاءه القديم) وانا ماعرف الا

الاداري : ياسلام .. (ياخذ الحذاء من يده ويعطيه حذاء جديد)
هالجوتي تلعب فيه هناك في الفريج .. اهني لازم تلبس
هالجوتي

مجود : انا لي البس هالجوتي احس اني مزنوط ولا اقدر اركض

الاداري : وبعدين معاكم .. ياشباب .. انتوا الحين في نادي رياضي
مب في الفريج الوضع اهني يختلف .. واهم شي عندنا
النظام ...

مجود : ياااه .. انا خلاص تمللت .. كله نظام نظام .ليكون
احنا في مدرسه

الاداري : بالضبط انتوا في مدرسه .. ولكن مدرسه لتعليم كرة القدم

مجود : يلا حمود نرجع نلعب في الفريج احسن لنا ...

الاداري : اسمع كلامي يامجود .. اخاف بعدين تندمون .. انتوا
لعيبه موهوبين حرام تدفنون مواهبكم في الشوارع
والفرجان ...

حمود : انا ماحب اللعب في ملعب حشيش ابي اللعب في الشارع

الاداري: وايش تستفيد من اللعب في الشوارع .. غير انك ترجع
البيت ثيابك مشقوقه .. ريلك مجروح ..

المدرّب : وريهتك خايسه

مجود : واهني ايش نستفيد يعني ؟

الاداري : اوووه .. الفوايد اهني كثيره يامجود ..

حمود : مثل شنوا يا استاد ؟

الاداري : (يحاول اغرائهم) .. هني راح تلقون كل الرعاية
والاهتمام .. اهني تلقون الشهرة .. وسائل الاعلام
تتهافت عليكم من كل مكان ...

مجود : (يرفع يده) شنوا يعني تتهافت يا استاد؟

الاداري : يعني وسائل الاعلام من تلفزيون وصحافه ومجلات
راح تركض وراكم من كل دول العالم .

حمود : ياسلام يعني بنطلع في التلفزيون وانصير مشهورين

الاداري : طبعا ياحمود

مجود : وايحطون صورتنا انا واخوي في الجريده مثل مارادونا
ورونالدينو ...

الاداري : اكيد يامجود .. وبتسكنون في افخم الفلل .. وتاكلون
اطيب الاطعمه .. وتركبون احلى السيارات .. صدقوني
بتعيشون حياه رغيده ..

حمود : (رافعا يده) شنو يعني رغيده يا استاد ؟

الاداري : يعني بتعيشون في عز واتكون عندكم فلوس ..

مجود : (مقاطعا) ياسلام .. يعني بتصير عندنا فلوس
ووووايد

الاداري : طبعا يامجود واتصيرون اغنياء ..

مجدود : يعني اقدر اشترى سيكل يديد

الاداري : (ضاحكا) تقدر تشتري سياره مرسيدس بدال السيكل

حمود : وانا اقدر اشترى جوال كرت هلا

الاداري : تقدر تشتري الثريا ياحمود

حمود : (رافعا يده) شنوا يعني ثريا يا استاد ؟

الاداري : اوووه... خلوا عنكم الاسئله الزايده الحين واهتموا
بالتمارين وارشادات المدرب عشان اتصيرون نجوم
كبار وياخذونكم للمنتخب.. واتسافرون اتمثلون البلد في
البطولات الخارجيه ..

حمود : ياسلام بياخذونا في المنتخب يامجدود

الاداري : طبعا بياخذونكم للمنتخب اذا شديتوا حيلكم .. صدقوني
ياشباب من هذا المكان راتكون انطلاقتكم لعالم الشهرة
والامجاد يلا شدوا حيلكم وروحوا بدلوا ملابسكم
عشان تتمرنون (يدخل مجود وحمود للداخل ويدخل
المدرب من الجهة الاخرى للمسرح ومعه بعض اللاعبين
ويقومون بحركات تدريبيه)

المدرب : يلا شباب يلا تمرين .. (يدخل مجود وحمود
بالملايس الرياضيه ويقوم المدرب بتقسيم المجموعه
لفريقين ويطلق صافرته .. تدخل المذيعة والمصور)

المذيعه: احبائي الاطفال نحن الان في ملعب نادي الزعيم الرياضي
ويسرنا ان نلتقي باداري الفريق الكابتن فهد بلنتي في
البدايه كابتن فهد هل لك ان تحدثنا عن الدور الذي تقومون
به في جلب نجوم الفريج الى ناديكم ..

الاداري : والله احنا بصراحه في نادينا يعني نقوم بمجهود كبير من
خلال البحث في الفرجان عن النجوم واللاعبين الموهبين
وانجيهم نادينا ومحاولة اكتشاف مواهبهم وبالتالي
الاستفاده من هذي المواهب للنادي والمنتخب الوطني ..
وانا بصراحه احب اوجه الدعوه لكل الانديه الرياضيه
انها تحاول تجتهد في البحث عن هولاء اللاعبين الهواه
الموهوبين وضمهم لصفوف انديتهم

المذيعه : كابتن فهد .. مالفرق بين اللاعب الهاوي واللاعب
المحترف ؟

الاداري : خليني اقولها لج باختصار .. الهوايه تعني الحريه ولكن
الاحتراف يعني النظام والالتزام .. (في الجئه المقابله
تحدث مشاده بين المدرب ومجود وحمود) عن اذنج
اختي لانه صايره هوشه بين الهوايه والاحتراف ..

المذيعه : شكرا للكابتن فهد بلنتي اداري فريق الزعيم وننتقل معكم
احبائي الاطفال الى فقره رياضيه اخرى وبرنامجكم
نجوم الفريج .. (تخرج المذيعه)

الاداري : (صارخا) مجود حمود اشفيكم

مجود : مانبي نلعب

الاداري : ليش ماتبون تلعبون ؟

مجود : ليش ايحطني ضد حمود اخوي .. احنا متعودين نلعب مع بعض ..

الاداري : يامجود هذي تمرين في المباراه انشالله بتلعبون مع بعض
يلا يلا يلا خلو عنكم الدلع وروحو وكملاوا التمرين ..
(يذهب مجود وحمود ويبدان اللعب مع المجموعه)

مجود : (يمسك الكره بيده صارخا) .. بلنتي .. حرام عليك ياكابتن
الكوره هذي بلنتي (المدرب يطلق صافره .. تدخل
المذيعه والمصور) ..

المذيعه : بلنتي يعني ضربة جزاء (تقوم المذيعه بتطبيق الشرح
على ارض الملعب) .. البلنتي او ضربة الجزاء هي
المخالفه اللتي يرتكبها اللاعب ضد لاعب الفريق الخصم
داخل منطقة الجزاء (يطلق المدرب صافرته فتهرب
المذيعه والمصور للخارج)

المدرّب : مجود ليش امسك الكوره بايدك يلا كمل .. اللعب هيببي
العب ..

مجود : وانا اقول بلنتي يعني بلنتي ...

المدرّب : مجود انا المدرّب والحكم هون مش انتة .. يلا روح
العب تمرين يلا (يدفعه بعيدا يتدخل حمود)

حمود : هي انت لاتدري اخوي .. (يتعاركون مع المدرب ويتدخل الاداري)

الاداري : بس خلاص .. عيب يا شباب

مجدود : مينون هالمدرّب يبي يضربنا

المدرّب : (صارخا) مجود حمود روحوا بيتكم .. يلا مع السلامة

حمود : اوووه مع السلامة .. مع السلامة .. ابركها من ساعه

مجدود : يلا حمود هيا بنا نرجع الى ملاعب الفريق ...

الاثنان : يلالالالالا

المذيعه: (تطلق الصافره) احبائي الاطفال استراحه قصيره
ثم نعود ونواصل معكم الشوط الثاني من برنامجكم
برنامج نجوم الفريق .. الى اللقاء

(نهاية الفصل الاول)

الفصل الثاني

(تبدأ احداث الفصل على ديكور ساحة الفريج امام منزل بو مجود
وهو نفس الديكور الذي كان في الفصل الاول ونرى سلوم
يداعب الكرة وسعد جالسا ياكل .. سلوم يتوقف عن اللعب
ويجلس بجانب سعد)

سلوم : تدري سعود من عقب ماراحو مجود وحمود صار اللعب
في الفريج ماله حلاه..

سعد : مجود وحمود صاروا نجوم الحين محد يقدر ايكلمهم

سلوم : اي خلاص كبر راسهم علينا .. حتى صاروا مايملون علينا
ولا حتى يسألون ..

سعد : انت ليش مارحت النادي معاهم

سلوم : انا ماخذوني النادي

سعد : زين انك مارحت عشان ماتصير مغرور مثلهم
(يدخل مجود وحمود)

مجود: السلام عليكم

سلوم : هلا والله .. مجوود حبيبي (يحضنه)

حمود : سعود حبيبي (يحضن سعد)

سعد : الحمد لله انكم تذكروننا

حمود : ومن قال ان احنا نسيناكم

سلوم : والله نسيتونا من رحمتوا النادي كبر راسكم علينا

موجود : افا احنا نقدر ننساكم بالربع .. شخبارك سعود للحين اترط
خبز وجبن وعصير بونص ... (يركل الكرّه) ياسلام من
زمان مالعبت كوره في الفريج ...

سعد : ما عندكم تمرين في النادي اليوم ؟

حمود : احنا طلعتنا من النادي

سلوم : افااااا .. لیش طلعتوا

موجود : خل ايولون .. تمللنا كله تمارين واوامر احنا ماحب حد
يتحكم فينا (يدخل من الجهه الاخرى للمسرح الاداري
والمدرّب)

المدرّب : شاييف يافهد .. هبوب رجع يلعب في الشارع مره ثانيه

الاداري : هذا هاوي ياكبتن .. والهاوي لازم اتعرف اشلون تتعامل
معاہ ...

المدرّب : هذا ولد شوارع مايصلح يلعب في النادي

الإداري : وانا وراهم وراهم .. ماراح اخليهم .. لازم ارجعهم
النادي .. الشباب موهوبين حرام انفرط فيهم.

(المذيعه تدخل مع المصور وتقف في احدى زوايا
المسرح وتطلق صافره والمجموعه تبدأ باللعب ..
سعد جالسا كحارس وسط المرمى وفي يده ساندويچ
وياكل .. الكره تذهب بعيدا)

مجود : سعود روح هات الكوره

سعد : يلا زين .. عبالك اشتغل عندك انا .. زين مني لعبت معاكم

مجود : زين ارأويك انا يالدب (غاضبا يحضر الكره ويركلها
بقوه في وجه سعد فيقع سعد على الارض والجميع
يضحك انه يمزح ولكن يبدو ان سعد قد اصيب في وجهه)

المذيعه: (معلقه).. لالا يامجود هذا خروج عن الروح الرياضيه
(سلوم يطلق صافره ويخرج كرت احمر لمجود)
اوووه يالروعه .. الحكم يطلق صافرته ويخرج الكارت
الاحمر في وجه اللاعب مجود.. ويبدو مجود مستاءا
من قرار الحكم ..

مجود : ليش تطردني ياحكم ماسويت له شي انا .. سعود قوم
قوم يلا عاد لاتتدلع علينا ..

المذيعه : مجود يقترب من سعد ويحاول مساعدته للنهوض

مجود : سعود اشفيك يلا قوم عاد... سعود قوم كنت اتغشمر
معاك (مجود يتفحص وجه سعد)

المذيع : اوووه يا للروعه وجه سعود ملطخا بالدماء.. مجود
يصاب بالهلع والخوف ويطلب المساعدة من صديقه سلوم
فيقوم سلوم بمساعدة سعد .. اووه يا للروعه سعود يبدووا
مغشيا عليه ..

سلوم : سعود .. ياسعود ..قوم . يالربع لازم نتصل بالاسعاف

المذيع : سلوم يتلفت خلفه فلا يجد مجود .. اوووه يا للروعه
لقد هرب مجود واخوه حمود من موقع الجريمة

سلوم : (يبحث عنهم) مجود.. حمود وين رحنوا .. (يتصل
بالموبايل) الو .. الاسعاف .. (صوت سيارة اسعاف +
المذيعه تطلق صافره والمصور يصور الموقف ثم
يهربان من المكان.. اضلام + فاصل موسيقى قصير
وتفتح بقعة ضوء في احدى اركان المسرح ونرى
مجود وحمود مختبين وخائفين)

حمود : شنسوي الحين يامجود .. الدنيا صارت ليل وين انروح

مجود : مادري انا خايف .. سعود خذوه في سيارة الاسعاف
والله يستر ..

حمود : اكيد الحين بلغوا الشرطه علينا

مجود : واكيد الشرطه الحين اتدور علينا

حمود : كله منك لو خليتنا في النادي ماصار اللي صار

مجود : روح زين .. صبح ما عندك سالفه

حمود : المهم الحل الحين .. لي متى بنتم منخشين في هالمكان ؟

مجود : حمود لاتحن انا مب ناقصك

حمود : مجود انا بردان ويوعان .. تعال نرجع البيت احسن لنا

مجود : اشلون نرجع البيت .. والشرطه اول مكان بيروحون له بيتنا ..

حمود : (صارخا) زين شوف لنا حل مايصير انتم هالشكل

مجود : (مقاطعا) اششش .. اسمع صوت حد ياي صوبنا ..
(تمر ٣ نساء من امامهم) حمود انا عندي خوش
فكره تعال معاي بسرعه (يتجهان نحو النساء
ويدخلون معهم خلف الكواليس مع فاصل موسيقي
كوميدي وفجاء نسمع اصوات النساء يصرخن .. يدخل
الاداري والمدرّب من الجهة الاخرى للمسرح)

الاداري : وين راحو .. اشلون ضيعناهم ياكوتش

المدرّب : اي دونت نو .. (يخرج مجود وحمود وهم يرتدون
ملابس النساء)

مجود : السلام عليكم

الاداري : عليكم السلام

حمود : انتوا شتسوون في هالمكان على هالليل ؟

الاداري : (مرتبكا) .. احنا .. احنا كنا رايعين ال .

مجود : (مقاطعا) اتحملوا بروحكم ترا في ثلاث حريم عجائز
ميانين شارددين من المستشفى والشرطه اتدور عليهم ..

حمود : ايقولون انهم لابسين ثياب كوره واي ريال ايشوفونه
يخنقونه .. فمان الله (يخرج مجود وحمود من
المسرح)

المدرّب : واتس هابن .. ايش السالفه كابتن فهد ؟

الاداري : مادري شالسالفه .. (تدخل النساء وهن يرددتين النقاب
وملابس رياضيه ويهرب الاداري والمدرّب من المسرح
والنساء يجرين خلفهم .. اضلام + فاصل موسيقي ثم
تفتح الاضاءه مره اخرى على صالة منزل بومجود ..
ونرى الضابط واقفا ومعه بومجود وام مجود)

الضابط : انت بومجود

بومجود : اي نعم يا حضرة الضابط .. وهذي حرمي المصون ام
مجود ...

الضابط : وين ولدك مجود ؟

بو مجود : مادري عنه .. والله يا حضرة الضابط .. من
صارت السالفه وللحين مارجع البيت لاهو ولا اخوه ..

الضابط : اتعرفون الولد اللي اسمه سعد ؟

ام مجود : اشلون مانعرفه هذي ولدنا .. انشالله ايقوم بالسلامه
والله تعببت يا حاضرة الضابط كثر ما قولهم خلوا عنكم
هالكوره ماوراها الا المصاييب والبلاوي ولا يسمعون
الكلام .. (لبومجود) كله منك انت يا بومجود

بومجود : وانا اشدراني بتصير هالسالفه

الضابط : خلاص يا جماعه خلاص .. هدي اعصايج يا ام مجود
وانشالله مايصير الا الخير (لبومجود) انتوا اتعرفون
الولد اللي اسمه سلوم ..

بومجود: اينعم انعرفه طال عمر ك.. سلوم ولد جارنا سالم بن
سلوم (يدخل مجود وحمود متنكرين في زي
امراتان كبيرتان في السن وترتديان العبايه والنقاب
واحذية كرة قدم وقد تفاجئا بوجود الضابط في
المنزل)

مجود : السلام عليكم

الجميع : عليكم السلام ...

ام مجود : من انتوا

حمود : احنا . احنا . احنا (متلعثما)

مجود : (لام مجود) انتي منوا ؟

ام مجود : وي .. داشين بيټي وتسالوني من انتي .. يلا يلا انجلعوا
ماعندي خرده..

مجود : ومن قالج نبي فلوس .. شنوا عبالج طرارات احنا

الضابط : انتوا اشتبون بالضبط ..

حمود : اشدعوه ضابط وعصبي ؟

الضابط : انتوا بتكلمون ولا اخذك مركز الشرطه ..

مجود : (بخوف) بن بن بنتكلم .. احنا بصراحه يابين بخصوص
موضوع مجود وسعود

ام مجود : (تهجم عليهم بعنف) .. بشروا شفتوهم .مجود
وحمود. لقيتوهم .. الله ايخليكم قولوا وين شفتوهم

مجود : بالعدال لاتشقين العبايه .. غاليه هذي شاريتها من سوق
الخميس والجمعه ..

بومجود: يابنت الحلال اشوي اشوي عليهم .. حياكم اتفضلوا..
(يدخلان وحمود رافعا العبايه ويبدوا الحذاء مكشوفاً
من الاسفل ومجود يهمس له)

مجود : يالغبي نزل العبايه لاتفضحنا .. جوتيك ايبيين ..
(بومجود ينتبه لهم ويضحك بخفيه ويبدوا انه قد
تعرف عليهم) ..

ام مجود : حياكم .. حياكم استريحوا .. اش تشربون ؟

مجود : دام انه بريء ليش ساجنينه

الضابط : لازم يبقى في السجن لغاية مانوصل للمجرم الحقيقي

الاثنان : مجرم (يهمان بالانصراف). الله يستر الله يستر الله يستر
(تدخل ام مجود وفي يدها صينييه بها كوب شاي
وكوب ماء)

ام مجود : تعالوا وين رايعين ماتبون تشربون الشاي والماي
(يعودان ويجلسان في اماكنهم)

مجود : اي والله نسينا نشرب الشاي والماي

حمود : مشكوره ياوخيتي (تشرب الماء) نشف ريجنا هالضابط

بومجود: الا ماقلتولنا وين شفتوا مجود وحمود ؟

مجود : احنا كنا رايعين الستي انا واختي

ام مجود : وعيالي شموديهم الستي ؟

مجود : (صارخا) احنا اللي كنا رايعين انا واختي مب عيالج
(يشرب الشاي)

الضابط : (بعصبيه) طيب وبعدين

مجود : وي وي وي اشوي اشوي علي خلوني اشرب الشاي
حشى مايخلون الوحده تشرب كوب شاي ... كملي
السالفه اختي ...

حمود : كنا كاشخين ورايحين الستى .. انا واختي متعودين نكشخ
ونتعدل وانروح الستى نقعد في الكوفي شوب نشرب
عصير بونص ...

الضابط : (صارخا) .. خلصوني وبعدين

حمود : وي وي وي اقولج عصبى هالضابط .. عصبى

ام مجود : (تنتبه على احذيتهم) .. وفي حد ايروح الستى سنتر
بعوتي كوره ؟ (مجود وحمود يرتبان)

مجود : هالا احنا كنا .. سشمه

حمود : احنا الله ايسلمكم .. ك ك ك كنا .. يعني ..

بومجود : (يتدخل وينقذ الموقف) اكيد اهمه كانوا رايحين
يمشون على الكورنيش ايسوون رياضه وعقب
ايروحون الستى سنتر .. عدل كلامي ؟

حمود : صح ... ماشالله عليك اشدراك ؟

بومجود : لانه وايد حريم اشوفهم يمشون على الكورنيش لابسين
جوتي كوره ..

الضابط : (بضيق) المهمكملوا السالفه وبعدين

مجود : وبعدين الله ايسلمك يا حضرة الضابط ركبنا تكسي ..
 واحنا في الطريق التكسي بنجر .. وشفنا العيال يلعبون
 كوره .. نزل راعي التكسي ايصلح التاير وانا واختي
 رحنا انشوف الكوره .. احنا انحب الكوره وايد .. تدري
 يا حضرة الضابط انا اشجع الرهيب واختي اتشجع
 الزعيم .. احنا اصلا من عائلة رياضية ابا عن جد
 لا واحنا بعد متطوعين في اسيا الدوحة ٢٠٠٦
 شفت الطير الكبير اللي طار في الملعب هاي اختي
 وشففت

ام مجود : (باستغراب) ماشاء الله

حمود : وشففتوا السفينه الكبيره اللي تمشي في الملعب .. هاي
 اختي ... واحنا يا حضرة ..

الضابط : (مقاطعا بغضب) .. يعني انتوا كنتوا في موقع الحدث ؟

مجود : (يدعي عدم الفهم) .. والله مادري يا حضرة الضابط
 شتقول ؟ مب فاهمه قصدك .. ترا انا مادش الانتريت
 وايد وفهمي على قدي ..

الضابط : لاحول ولا قوة الا بالله ... اشدخل الانتريت في السالفه
 انا اقصد انكم ماكنتوا في مكان الجريمة لحضة وقوع
 الحادث ؟

مجود : جريمه

حمود : حادث

الأثنان : الله يستر الله يستر الله يستر (يهمان بالانصراف)

الضابط : تعالوا اهني وين رايعين .. قعدوا مكانكم (يجلسان)

الضابط : تعتقدون ايش اللي خلا مجود يعتدي على سعد
بالطريقة الوحشية هذي ؟

حمود : اشدعوه وحشيه ..

مجود : لاوحشيه ولا شي .. انتوا على كيفكم سويتوها وحشيه
انا شفته بعيوني واختي معاي اشلون مجود شات الكوره
في ويهه سعود .. (يخرج الكره من تحت العباءه
ويضعها على الارض .. ويقومان بتمثيل الموقف ويركل
مجود الكره في وجه حمود الذي يقع على الارض
بهداوه)

حمود : (يتالم بنعومه) .. ااااااي ..

مجود : وعقب ما قال ااي طلع من خشمه اشوووووية دم .. يعني
نقطه واحده

الضابط: تقارير المستشفى اللي عندي اتقول انه سعد عنده كسر
ونزيف في الانف ...

حمود : يمكن سيارة الاسعاف يوم شالوه طاح من يدهم وانكسر
خشمه ..

مجود : اشدعوه شايلين كبت (يضحك الاثنان بطريقة كوميديه)

حمود : حلوووووووه وربى حلوووووه

الضابط : (صارخا) بس خلاص ... وبعدين معاكم

مجود : (مواصلا شرحه بخوف) عاد احنا يوم شفنا السالفه
هالشكل ومجود المسكين خاف وشرد قلنا لازم انقولك
الحقيقه يا حضره الضابط

الضابط : اي ماقصرتوا جزاكم الله خير. (لبومجود وام مجود).
وانتوا يا جماعة الخير اذا استجد عندكم اي شي كلموني
على هذا الرقم. (يعطي بومجود ورقه). يلا مع
السلامه (يخرج الضابط وبومجود يسير معه حتى
يخرج من المسرح .. بومجود يهمس لام مجود وكأنه
يكشف لها الحقيقه بينما مجود وحمود جالسين على
الكنبه وهم واضعين رجل على رجل .. ام مجود
وبومجود يقتربان منهم)

ام مجود: (لبومجود بهمس) والله من صجك .. انت متأكد ؟

بومجود : اي والله متأكد ونص

ام مجود : (صارخه) .. نزلوا اريولكم يعل ريولكم الكسر ..
ليكون عبالكم يالسين في بيت ابوكم .. (يفزع مجود
وحمود ويهمان بالانصراف) تعالوا وين رايعين ..
تعشوا عندنا

الاثنان : صبح والله .. (يعودان ويجلسان على الكرسي)

بومجود: بل ماصدقوا ...

الاثنان : شتقول

ام مجود: ايقول زارتنا البركه والله .. حياكم الله

الاثنان : الله احييج

ام مجود: (تقترب من مجود) انتي شسمج ؟

مجود : انا اسمي حلیمه

ام مجود: وانتی شسمج

حمود : انا انا بهیمه .. لالا لا .. فهیمه .. لالا لا انا اسمي سلیمه

ام مجود : اي حياكم الله .. اخذوا راحتكم البيت بيتكم .. خلك يالس

معاهم يابومجود اروح ابرز لهم العشى ..

(فاصل موسيقي كوميدي وعلى اثره تذهب ام مجود

من خلفهم وتأخذ عصاها دون ان ينتبها لها وتسحب

عنهم العبايات وتضربهم وهم يهربون للداخل

وبومجود يجري خلفهم بشكل كوميدي .. اضلام +

فاصل موسيقي .. تفتح بقعة ضوء بها مكتب الضابط

ومعه الاداري والمدرّب والمذيعه)

الضابط : (باستغراب) شتقولون ؟ مجود بريء

الاداري : اي نعم بريء يا حضرة الضابط .. احنا كنا موجودين في المكان ومجود ماكان يقصد ايعور سعد ...

الضابط : وانتوا اشدراكم مجود ماكان يقصد ايعور سعد

الاداري : انت عارف يا حضرة الضابط عيال الفريج دايماي لعبون ويمزحون مع بعض .. ومجود كان يمزح مع سعد لما شات الكوره في ويهه ..

المذيعه : احنا كنا انصور في الفريج .. (تسلمه شريط فيديو) وهالشريط فيه دليل براءة مجود

الضابط : مشكورين يا جماعه وماقصرتوا على تعاونكم .. لكن اللي ابي اعرفه ليش مجود شرد ؟ (اضلام وتفتح الاضاءه على منزل بومجود .. مجود واخوه حمود جالسان على الكرسي مربوطان بحبل وام مجود في يدها العصاه واقفه وبومجود يقف بجانبها) ...

ام مجود : ليش سويتو جدي يا مجود

مجود : احنا ماسويناشي غلط يايمه

ام مجود : يوم انكم ماسويتوا شي غلط .. ليش شردتوا...

حمود : انا ماشردت مجود هو اللي خلاني اشرد معاه

بومجود: اشلون يا عيالي اتخلون سعد ينزف.. ورفيجكم سلوم
المسكين ايتورط في السالفه وايدش السجن ..

مجود : يبه الله ايخليك ترا اللي فيني كافيني

حمود: كلام ابوي وامي عدل يامجود...اللي سويته غلط ..

مجود : ها حموداشوفك قلبت علي .. انت معاي ولا معاهم

حمود: انا مع الحق ياخوي..

مجود : وانا قلت لكم ماسويت شي غلط

ام مجود: عيل شتسمي اللي سويته يامجود ؟ ...

مجود : لعب كوره يايمه . احنا كنا نلعب مع بعض لازم واحد
ايطيح واحد ايتعور واحد ايتكسر بعد شنسوي هذي الكوره

حمود: لكن انت شت الكوره في ويه سعود بالعماله

مجود : حمود اشفيك علي اليوم .. انت معاي ولا معاهم

حمود : قلت لك انا مع الحق

بوحمود: المهم انشالله سعد ا يكون بخير.. ولا بيقطون
ولدج في السجن يام مجود..

ام مجود: انا اقول يامجود اتروح واتسلم نفسك للشرطه احسن لك .

مجود : اسلم نفسي للشرطه ؟ يمه انتي شتقولين ؟

بومجود : كلام امك عدل ترى بعدين تكبر السالفه وتتورطون كلکم

ام مجود : واحنا مب ناقصين مشاكل يايمه .. لي متى بتم شارد
من الشرطه ..

مجود : بس انا خايف

حمود : ليش خايف ؟

مجود : خايف ايقطوني في السجن .. والسجن فيه صراصير
(يبكي) انا اخاف من الصراصير يا حمود انا ماكنت
اقد اعود سعود ولا اضره وانت كنت معاي
وعارف هالشي .. انا بريء والله العظيم بريء
(یرن جرس الباب)

بومجود : زين زين ياك .. (يذهب لتفتح الباب)

حمود : يما وين العشى انا يوعان

ام مجود : انشالله يمه الحين احط لكم العشى
(يدخل بومجود على المسرح ومعه الضابط والاداري
مجود وحمود يرتديان العبايات)
درب .. درب يا ام مجود .. حياکم ياکم ياجماعه
اتفضلوا ...

الضابط : السلام عليكم

ام مجود : عليكم السلام

مجود : المهم احنا انترخصن يا ام مجود

حمود : انشالله بنمر عليكم في وقت ثاني

ام مجود : وين رايعين ماتبون تتعشون . (حمود يعود ويجلس)

حمود : اي والله ماتعشيننا (يسحبه مجود)

مجود : قومي انا تاخرت عيالي في البيت بروحهم مع الخدامه
واخاف ريلي ايهماوشني (يهمان بالانصراف فيمسك
بهما الضابط)

الضابط : لحظه لو سمحتوا محتاجينكم اشوي في التحقيق

مجود : هذني اشفيك .. اقولك متاخره على عيالي في البيت..
(مجود وحمود يحاولان الافلات من يد الضابط
فيسحب العبايات من فوق رؤسهم)

الضابط : مجود .. حمود مافي داعي للهروب احنا عرفنا كل شي
انا ابي اسالكم سوال واحد بس .. ليش سويتوا جذي
ليش شردتوا يامجود ؟

مجود : لانني كنت خايف اتقطوني في السجن (يبكي)

الضابط : ليش انقطك في السجن .. انت بريء يامجود الاخ فهد
شرح لي كل شي وسعد الحمدلله بخير.. وام سعد تنازلت
عن القضيه . وسلوم طلع من السجن.

الاداري : كان المفروض انك ماتشرد يامجود واتواجه الموقف
بشجاعه

ام مجود : طول ما انك ماسويت شي غلط لاتخاف ياولدي..

الضابط : انت انسان رياضي يامجود ولازم اتعرف انه الرياضه
شجاعه وفن واخلاق..

الاداري : واللاعب اللي يتحلى بالروح والاخلاق الرياضيه
الجمهور ايجبه ويحترمه

بومجود: عدل كلامك اخوي فهد وانشالله ياولدي يامجود تعلمت
من هالدرس

مجود : طبعا تعلمت ياييه .. واوعدكم اني اكون رياضي ناجح
واخدم بلدي في المجال الرياضي وشعاري دائما الرياضه
فن وذوق واخلاق

الاداري : وانا جدامكم الحين اسمحوا لي اقدم عرض على مجود
واخوه حمود انهم ينظمون معانه في نادي الزعيم

ام مجود : اشلون .. عيالي يلعبون كوره مره ثانيه لالا لالا
ان شفتهم ايشوتون كوره عقب اليوم حشيت ريولهم
حشش ...

